

國

朝

詞

綜

國朝詞綜卷三十四

青浦王昶纂

朱芳靄 二十二首

姚培炎 一首

張冕 三首

徐柱臣 二首

汪棟 一首

廖景文 一首

張裕榮 一首

汪仲鈐 三首

朱芳靄

字吉人號春橋桐鄉人監生有小長蘆漁唱四卷

高槎客云桐鄉朱子春橋竹垞太史族孫碧巢農部之外孫也其詞句琢事鍊調合律諧具有小長蘆家法

天香

龍涎香

蜃市春回驪宮睡醒癡龍凍蟄驚起沫擁層波唾留不
島初散半天雲氣拏舟採取更仿得瓊英古製萬里星
槎携到簾櫳幾回閑試熏鑪片銀島翠撥沉灰每勞
纖指一縷花香不散慣消殘醉最憶幽人高致聽夜雨
菰蘆短篷底作畫題詩濃烟滿紙稗史彙編龍涎出大
食國近海常有雲氣
罩住山間卽知有龍睡其下候雲氣散往觀之必得龍
涎佩楚軒客談浩然齋有古龍涎香自東閣瓊英以下
凡數品雲林遺事倪元鎮爲催利所擾逃去匿菰蘆中
焚龍涎香柯敬仲詩云夜雨推篷寫松石焚香何處獨
題詩蓋紀寔也

桂枝香

解

湖田秋老見香穗輸芒雙螯低抱記得枯枝粉本曾留

纖爪潮平月落爬沙響正江空滿天霜曉橫行淺岸綠
蕭截處一燈紅小 十六輩寒蒲縛好喜水市河橋漁
童携到割取蓴芽夜付厨娘親擣碧鱸黃雀閑評遍總
輸與尖團風調登盤時節秋簞熟後菊花開早

畫譜有蟹爪紋

法黃庭堅詩寒蒲束縛十六輩

摸魚子

雨中過太湖

挂輕帆隨流東下烟波空濶如許青蘆搖動涼風裏商
畧曉來淒雨回望處正霧色模糊染就魚天暮沙頭宿
鷺應笑我頻年行蹤不定飄泊似飛絮 浮生事想到
而今纔悟虛名休再相誤封侯料得非吾分且作五湖

漁父西去路更水杳雲深儘足留人住鱸鄉社樹待烏
柏紅時雁花開後准著綠蓑去

燕山亭

陸茶塢招同蔣西原李客山趙飲谷金謝
山汪伯子家兄浚谷集水木明瑟園之介
白亭

路轉色離人到蓬門三徑苔初掃獨木橋西十笏閑亭
如坐缺瓜船小影落鷗波只少片飛帆樹杪春早又柳
弄微黃幾絲風裊孟公投轄常豪况舊雨新知總稱
同調笋斫猫頭芹收鴨脚鮮美園蔬堪飽暝色簾衣
勸客玉缸頻倒歸好映前溪月華圓了

賣花聲

過堯峯女真院

芳草滿平沙路繞峯遮前途遙指石梁斜一夜雨餘春
水足流出桃花門外結籬笆鸞鶴人家經牀丹鴨送
年華料得綠窗塵夢斷常伴烟霞

釣船笛

月夜瓜步守風

雪浪打城根一片蘆花搖白天意欲留人住領濤聲月
色江南昨夜繫孤篷今夜又江北應惹沙頭宿鷺笑
飄零蹤跡

瑤華

壬申元夕同恂堂泛湖烟水蒼茫風景蕭瑟
山樓汀樹盡入玉壺相與沽酒堤邊陶然共
醉因成此曲以志清游

燒燈時節釀雪天光覺春寒倍作西南湖寺都換了十

里濕銀樓閣清游正好忍堤畔畫船閑却隨冷鷗飛度
平波直到段家橋泊 況逢茅店青旗拚踏凍沽春同
罄杯酌層巒遠樹吟望裏最憶孤山籬落苔痕半澁料
未得齊開紅萼待暖風吹遍南枝好試尋芳芒屨

釣船笛 殘柳

秋氣滿江潭吹老幾絲烟葉縱有行人離恨也不堪攀
折 寒鴉棲遍最高枝遙夜叫霜月空憶綠陰池館弄
春鶯時節

一落索

簾外殘英風裏絮
臙韶光幾許櫻桃樹底薄寒生送一

陣廉纖雨 午餘夢醒無情緒任空梁燕語好春時節
尙多愁况又是春歸去

浣溪沙

十二重簾鏡檻邊玉鉤高捲晚春天綠陰庭院鳥聲圓
茶盃新芽嘗雀舌香爐小片蕪龍涎儘消殘晝落花
前

南浦

題沙斗初春江雨泛圖

細柳罩烟濃過芳塘幾度陰鳩催暝三月雨偏多疎籬
外滿地殘花紅凝山橋野店微茫不辨青旗影鏡裏何
人閑蕩槳劃破濕銀千頃 笠簷蓑袂攜來畫圖中仿

佛元真清興寒碧浸魚天吟詩去不怕水雲鄉冷蜻蜓
小艇浮家也擬操笭簖相約吳淞江上路浙瀝打篷同
聽

湘月

吳門留別王述庵吳竹嶼曹習庵張少華沙
斗初張古樵舍姪秋潭次竹嶼贈行原韻

銜杯幾日又杜宇催人聲聲低度聚散頻年渾不定笑
比沙鷗汀鷺折柳心情熟梅時節齊唱陽關句明朝江
上獨聽篷背涼雨最憶修竹飛泉山樓結夏不共吟
朋住一夕河橋新漲滿早送蘭橈歸去鶴渚烟秋鴛湖
月曉總是相思處甚時攜手訴儂離別情緒時同人有
寒山消夏
之約

好事近

題蔣蓀湄桃花溪水圖二闕

流水罨吳雲萬樹桃花成塢蔣詡舊開三徑在桃源深處
討春閑上楸頭船柔櫓掠波去一帶繁枝牽惹滿
篷兒紅雨

又

澹蕩占鷗波懶踏東華塵埃閒却凌雲賦手把釣絲輕
鵬年來我亦願浮家烟舍定相訪一舸金昌亭下趁
桃花春漲

天香

淡巴菰和秋潭

瀛島傳香閩山分翠江鄉近日都有綠葉齊乾金絲細

切味比檳榔差厚玉纖拈得待吸取清芬盈口朶朶巫
雲輕颺餘痕隔簾微透 筠筒一枝在手悶無聊儘消
殘晝留客茶鐺未熟採囊先授最憶宵寒時候頻喚剔
春燈小紅豆幾度氤氲如中卯酒

瑤華

茶花

旗槍已老風露初零正吳歌銷歇丹楓映處離落外乍
見數枝如雪吹來香氣尙髣髴焙春時節只可惜開近
秋闌一片白雲凝葉 閒把芳姿品第有寒菊孤梅堪
並高潔瓊英零落笑不比嫩蕊能消殘渴碧螺峰下料
重理雨前生活應和花摘向霜天製就小團明月

洞庭
東山

產碧螺春茶最佳秋時採者名秋片味尤香美

滿庭芳

蘋婆果

產自幽燕熟當炎夏衆禽那肯來遲江南種少俊味幾
人知不獨金經載取論佳名兼入風詩筠籃啟憐他顆
顆齊著淡胭脂 甘芳誰許並仙林大谷較此差池慣
酒闌消渴堆滿青瓷移傍枕面更好微香度殘夢回時
分貽處何須紅豆方得號相思

廣志林擒一名來禽言
味甘熟來禽衆也北人

呼爲蘋婆果蘋婆果見首楞嚴經一名相思果會稽蘋
婆果詩芳艷絕勝仙林杏甘脆全過大谷梨日下舊聞
云卽詩所云甘棠采蘭雜志蘋婆果夜置枕邊微有香
氣

齊天樂

題雲溪杏花影裏填詞圖

夢中曾記生花後揮毫便饒清妙墨灑羅裙曲修簫譜
寫出閒情多少江南春早又風信重番枝頭紅開擗笛
孤吹絳雲濃處一聲繞昏黃半籠淡月照來香霧裏
枝影斜倒深巷人稀重門夜靜誰會此時懷抱填成宮
調惜少箇雙蛾按歌音裊徒倚牆陰五更寒尙峭

又 凡五樓望隔江山色

蜀岡萬樹松陰翠層臺俯臨松頂窻格初除簾波齊揭
雨後天開雲淨當空引領愛螺髻成堆隔江相映不斷
遙青一峯欹仄一峯整風流最憶太守有無山色處
闌檻曾凭新築名樓恰依勝地攬盡江南風景思尋昨

艤便趁取歸途探幽林徑鎮日攜筇撲衣巒氣冷

買陂塘

同人延山亭絕涼

啟園扉枳籬石磴迎風搖曳蒲碧虛亭恰在叢筠裏更
覆桐陰百尺涼翠積便盡捲湘簾那有炎埃入並除巾
幘忽頭上雲遮斜飛數點松雨灑瑤席披襟適閒坐
閒行儘得何論爲主爲客堆盤瓜果冰人齒不獨茶成
甘滾河渚隔問歌舫誰移頻弄臨風笛漸沉山日料今
夜歸途涼蟾應滿柳外一丸白

解連環

丁亥閏七夕揚州客舍作

夜涼如水算盈虛節候金風纔至此夕又銀漢佳期向

露葉中庭再陳瓜李不是今番已漸近中秋天氣正月

輪將滿木犀乍放飛觴沉醉

回思廿年光景

戊辰歲亦閏七

夕迄今二十年矣

記重番乞巧曲闌干倚悵孤蹤今滯江淮把

小扇輕羅仰看無寐靈鵲殷勤兩度引雙星迤邐應笑人何事蹉跎乘槎歸計

天香

香櫞

氣勝襄橙形侔楚柚卑枝密葉藏徧不墮風前乍經霜
後團盛越羅黃綻唐梯傍樹看顚顚朝來齊翦觸手濃
香常惹摩挲記當秋晚 烏皮几臨窻畔疊青瓷供人
清玩底用更排古鬲沉烟裊篆百結流蘇成串挂斗帳

渾同月痕滿隔歲猶馨時參鼻觀

姚培炎

字安圃金山人
諸生有遠春詞

憶秦娥

愁難說黃鶯枝上偏饒舌偏繞舌聲聲啼過禁烟時節
秋千又向鄰牆出夜臺人已經年別經年別梨花吹
雨楊花飛雪

張冕

字冠伯丹徒人貢
生有春雨樓詞

如夢令

誰弄押簾銀蒜蕩起春愁一片殘夢不分明恍惚梨雲
零亂零亂零亂卻被曉風吹散

倦尋芳

新漲

斷隄過雨荒浦生烟波嫩于染拍岸平橋迷了舊痕一
半漾碧揉成芳草色蕩紅流出殘花片乍風來把柔光
拂破翠紋吹散憶前度采香幽徑輕泛浮鷗低舞飛
燕夢繞滄浪漠漠水雲平遠亂柳陰中搖艇去碎蘋香
裏收綸返待何時約瑤姬藕塘相見

醉蓬萊

新漲

漸蒸梅雨潤擘柳風柔碧痕鋪徧濕翠迷濛把殘紅偷
換鎖燕枝鮮藏鶯葉嫩比花時葱蒨薄蔭垂涼輕陰障
暖清和庭院回首韶光去如流水芳徑重遊轉添淒

怨摘子攀條歎尋春何晚密幄高張軟茵低藉奈吹香
人遠雲影沈沈煙光漠漠總教遮斷

徐柱臣

字題客崑山人貢
生有良岑樂府

珍珠簾

拜月

雲空碧落寒光透挂疎簾小院新秋時候堪罷下蘭堦
正月華如畫鵲尾燒香心字結問此意素娥知否稽首
恰花陰滿地璽瓏衫袖惟願萬里嬋娟似清輝此夕
年年依舊莫漫近黃昏只照人消瘦涼露濕衣扶不起
壓繡墊湘裊微皺垂手倚熏爐小立又聞蓮漏

又折花

游絲裊裊春光暮曉鶯聲啼到綠紗深處凭遍曲闌干
見落紅無數砌外殘枝開正好眺望久緩移蓮步還住
怕摘得花來送將春去 須是素手輕拈好斜簪髻側
半添眉嫵細把又重看漸暗香微吐憔悴玉肌嬌漸減
更說甚此花能助延佇聽隔巷飴簫濛濛酥雨

汪

棟

字峻堂休寧人諸生

小重山

登康山

黃葉飄飄映晚霞闌干層疊處月痕斜扶筇提榼踏平
沙臺邊坐間說舊宮花 勝會百年誇荒邨留不住舊
繁華傷心怕見樹棲鴉還應喚紅袖撥琵琶

廖景文

字觀揚號古樸婁縣人寓居青浦乾隆十二年舉人官合肥縣知縣

蝶戀花

夢裏西風驚別緒着意涼生那更連宵雨挑罷玉蟲聞
鴈語一聲聲度遙汀去 迎澱湖山誰是主百尺樓高
寒夜留春住紅燭青絲雙映處珠簾不捲填金縷

張裕華

字幼穆桐城人乾隆十三年進士官至國子監祭酒

相見歡

以木瓜贈西樵承製新詞見示因和韻

筠簾采自芳林快招尋好似洞庭柑熟客分金 啜茗
後消清晝展葵心博得紅牙旋拍短長吟 蘇舜欽詩笠澤鱸肥人贈
玉洞庭柑熟客分金

汪仲鈞

字豐玉秀水人乾隆十五年舉人有懷新詞一卷

江城子

昏黃院落雨潺潺杏花殷蘚花斑生怕尖風繡戶不開
關香氣爲嫌銀鴨遠教掇過小屏山春衣成後剪刀
閒見嬌鬟兩眉彎病熱心情比舊越闌珊隔著燈光無
一語輕自解九連環

風入松

雨夜懷厚石松江

社公有意濕鞦韆柳困小桃嬌熏籠熨斗衣教護餘寒
在未卸吳綿壞壁微侵蝸篆空階暗長苔錢密雲淅
淅四垂天亭館掩蕭然濁醪引去今宵夢菰蒲響何處

吟船山淺陸機茸外潮平陸捐湖邊

國香慢

梅

雪擁牆腰問尋詩幾度弄藥華條收燈怪他風緊捲地
香飄莫遣鞦痕重踏總零亂野店山橋橫牕舊時月瘦
影難摹空展生綃故人幽事廢喚扁舟鄧尉屢負佳
招餞杯慵舉哀怨都付鸞簫說道明年相見縞衣卸分
外魂銷濃陰遽如許夢轉被南華羽脩翮

國朝詞綜卷三十四

國朝詞綜卷三十五

青浦王昶纂

吳烜 二十三首

周天度 三首

董元度 一首

謝墉 一首

周大樞 一首

汪士通 五首

王鳴盛 八首

王天發 三首

吳

烜

字荀叔全椒人乾隆十六年召試賜內閣中書官至寧武府同知有杉亭詞四卷

釣船笛 漁父

霜月落孤篷人在蘆花深處風細水紋吹皺飛半江殘
絮晚潮初上響船頭蕩入蘆汀去菰飣夜來炊罷伴

一灘鷓鴣

齊天樂

能仁寺看梅

五年重入孤山夢，梅花不堪零亂。
十里蒼烟，一庭翠雪，香界空濛吹徧。
疎跗細幹，似歷盡荒寒，漸成悽怨。
露冷嬌紅，破寒憔悴淚痕泣。
婆娑花下，小立悵年時蹤跡。
心病形懶，廢館苔青，荒池水碧。
都付夕陽春晚，閒愁自遣。
待相對安禪藥爐，經卷明月松門。
煖風飄碎點。

暗香

寄江賓谷

斷崖畧約憶小舟，晚繫雲深林薄。
可惜片時負了，迢迢數年約。
猶記秋花幾點微雨，濕嫩黃籬落。
只有夢裏。

曾來門巷最遼邐
簾箔掩寂寞見客館綠梅漸發疎
萼冷香漠漠不管東風正蕭索何日重尋伴侶招小艇
紅橋同泊看次第生徧也遠洲杜若

探春

度曲人歸賣花聲散嫩涼天氣初霽窄袖拖藍輕衫束
素弱骨不堪羅綺小立赤闌橋還只怕晚風吹起無端
擲與相思雙暈斜剪秋水 舊事思量如醉便銷盡吟
魂知他知未病草侵階蠻花糝徑小雨黃昏門閉獨自
守空庭爭禁得許多憔悴一幅鮫綃爲伊都染紅淚

浣溪沙

新晴

獨倚危樓望曉天
雨餘風景劇堪憐
馬嘶深巷草芊芊
幾點濃愁山染黛
一行香夢柳梳烟
斷腸春色又今年

齊天樂

絡緯

豆花雨過疎棚下
蕭蕭乍鳴機杼
輕轉縑車細縈絲繭
織就人間愁緒
秋陰散暑倚闌檻
重聽恨凝眉
嫵暗憶金徽
寒衣猶自未裝絮
庭柯漸沾涼露
玉笙新夢覺
聲續如縷
薜荔空牆
薜蘿舊徑
吟到紫苔庭戶
長門伴
侶怕團扇恩情
又成遲暮
嘶斷殘聲
砌葦深夜雨

綺羅香

贈嚴東有

花下填詞酒邊寄恨半生哪寫情緒塵冷江毫惆悵好
春遲暮倚虛廊滿徑新苔掩重關一簾微雨又誰知顧
曲人來拂箋吟我斷腸句少年懷抱漫與曾記寒燈
一點細翻笙譜心是秋蓮抽盡愁思千縷撫焦桐絕調
誰彈碎胡琴賞音難遇擬何時剪燭焚香西窓深夜語

高陽臺

上巳後五日招同陳寶所小飲寓齋

陷火煎香鈎簾約燕小齋漸覺春深倦眼開時奈無佳
處登臨相期尚有南鄰伴且銜杯三兩同心酒頻斟水
隄山膚風味堪尋雞缸百罰休辭醉問風塵燕市幾
許知音一笑尊前依然脫帽披襟家山烟水漁樵路想

國朝詩集卷三十一
三
桃花紅遍疎林暗沈吟小艇春潮孤負江潯

疎影

春暮同王穀原重步昆明湖隄上作

虹梁雨霽正綠波渺渺霞斷魚尾望裏樓臺丹碧瓏玲
空濛一片雲氣歆斜禁柳三眠後漸落盡香綿初起染
翠嵐萬壽山明髣髴莫釐幽致一帶新隄宛轉水田
更放溜泉注湖觜畫舸中流錦纜牙檣點綴十分佳麗
蓬瀛未怕天風遠便說與人間知未似夢魂重到仙都
歷歷舊遊堪記

綺羅香

西苑直廬春雨同穀原作

溪染新藍山添遠翠天氣濛濛催暮雲軟風驕不辨簾

前烟樹聽穿花禁漏聲遲看隔葉宮鶯飛去想昆明湖
水連漪綠燕生遍舊時路蕭疎此際風景只合尊前
對酒閒評詩句衣潤襟涼贏得無聊情緒最憐他滿地
榆錢渾不見一天風絮問幾時好趁春湖桃源同喚渡

摸魚子

題友人藝圃

展湘奩風潭百頃秋窗拓向明鏡水亭四面涼颺入坐
對遠山初暝堪托興渾不似兒寬只帶殘書本雨昏烟
冷想早韭微黃晚菰淡碧此味共誰領江鄉好回首
萍蹤無定應憐歸夢難準灌園輸與烟霞侶消受閒中
風景波練淨待下了魚筒少箇沙棠艇一天霜信看幾

國朝詩集卷三十三
樹衰陽數竿修竹綠減石苔徑

淒涼犯

秋柳同穀原作用白石韻

夕陽簾幕波紋細西風向晚蕭索瑣窗未啟凝妝欲卸
怕凭樓角秋心漸惡想昔日柔情未薄記春初麴塵瘦
影幾縷正寥漠誰在雕闌畔唱徹陽關漫傷哀樂故
人執手數寒雅一行零落莫折殘枝更分付吟鞭慢著
尙依依小立岸觜待後約

琵琶仙

秋陰

樓倚蒼烟綠楊樹換盡春深顏色橋外波影搖空歸雅
點虛白風乍緊涼生翠袂漸穿入一痕簾隙葉上秋聲

欄邊暮景愁老羈客 偶然見魚艇隨潮打雙槳悠悠
破寒碧歌徹渭城殘句有何人橫笛三兩盞嬋雲嫩蕊
洗宿醒更就瑤席莫管滴碎空堦小窓今夕

清波引

憶采菱同祝豫堂作

冷烟斜港記橋外晚潮綠漲蓼花低漾玉人盪雙槳淺
渚掠波去不礙沙鷗來往剪將烏角堆盤似弓玉那時
樣 江鄉入望問秋水誰掉小舫舊游無恙料應也惆
悵湖甯白茆屋多少贅洲漁唱一任蓮葉東西醉歌烏
榜

雨中花

豆花

一架西風嫩涼先到小園恰好秋分是誰將弱蔓扶上
離根消受幾番清露新英淺綴霜痕訝連宵未摘離披
短筴青挂朝曦野人風味却憶疎柳水天閒話山村
任屋角莎雞促織吟徧朝昏試問幾多黃葉秋聲偏在
柴門思歸張翰也應爲爾一賦銷魂

張翰有豆羹賦

醉蓬萊

葫蘆

看牆陰葉老籬落花殘玉壺縹碧長柄低垂似瓊漿輕
浥丹竈難成方舟獨泳閱幾番陳迹料得黃姑秋心應
歎匏瓜無匹莫是幽人此中高隱別有風光儘堪棲
息且倒清樽泛玉舫明瑟夜雨分畦曉霜壓架弄一天

寒色依樣描來年年空繫晚風檐隙

霜葉飛

薑

曉寒偶到嗟邊過青分高下千稜區田一帶近山腰瓜
架聚林斜引看歷歷爪痕新印輸他紫蕨如拳嫩和小
七香餠又配八青梅數粒風味清韻 解道斂手官奴
墨花輕寫不數薤葉端正禦寒獨喜老尤辛只秦椒堪
並有幾輩霜螯縛穩黃花爲我添秋興縷銀刀傾玉盞
一點微馨宿醒應醒

瑣窗寒

車上墮帷

斗帳招涼羅幃貯月讓伊輕煖香車油壁絡索流蘇都

滿任風飄天街暗塵晶簾自在垂銀蒜想靈芸初嫁唾
壺凝碧幾番腸斷春半芳隄畔有寶馬相逢柳陰低
喚心期欲訴較隔重城天遠似依稀雲母小窗畫船搖
漾溪水淺望桃花門巷沈沈難見東風面

摸魚子

送機亭南還次韻

又匆匆殿春開盡流光容易如許玉河楊柳東風岸一
棹咿啞歸去君且住君不見篋中留得殘雲賦閒愁漫
訴到烟月揚州征衫浣罷再寫斷腸句人間事得失
塞翁都誤萍蓬偶爾相聚玉顏可惜紅塵老閱徧麥風
梅雨渾莫據問上消春蠶何苦縈離緒酒醒甚處向通

路亭邊幾回西笑不記別時語

又蘋花和筠樹

水雲涼沙棠小艇一篙撐到南澗田田絕似新荷葉葉
與花浮水面離恨遠望過盡千帆脉脉迴腸斷樓東寫
怨想提起芳名也應值得一斛夜珠換波紋細荇帶
蓴絲相罨舊盟鷗鷺灘淺越王宮殿濛濛雨尙憶江樓
簾卷春又晚怕芳草汀洲空把歸人盼韶光一箭又杜
若香中水荇花外秋意渺何限溫飛卿詞過盡千帆皆
不是斜暉脉脉水悠悠
腸斷白蘋洲朱松卿詞越王宮殿蘋葉藕花中簾卷小
樓魚浪起千片雪雨濛濛寇平仲詞江南春盡離腸斷
蘋滿汀洲人未歸

水龍吟

雨中集筠樹齋中送海門還京口

新京才換羅衫如何竟放扁舟去一叢黃葉數枝紅蓼
落潮魚步北固山高西津人遠濛濛烟樹怪深杯未勸
此情先醉添惆悵都無語後會應知非誤奈尊前別
懷偏苦梧窗細響苔階碎點滴成離緒天水微茫雲清
層疊夢驚南浦想碧翁也愛良宵留客聽瀟瀟雨

齊天樂

鶴

斷蘆折葦空江上閒心一片淒冷飲露魂孤吟霜韻遠
不比驚寒雁陣波明水淨戲赤壁坡仙俊游清興三島
沈沈羽衣歸去暮天暝園亭花樹縱好甚棲遲勁翮

愁老誰問華表家鄉晴川樓閣往事不堪重省滄溟照
影只雪滿春衫臘將丹頂明月前身素雲吹萬頃

綺羅香

集格里書齋觀雨中玉蘭

濕粉牆高綴珠簾矮獨立娟娟庭際百朶清寒蘸徧瑤
池春水想朝天素面爭妍宛惜別啼妝偏媚問昔遊人
到唐昌此時還似舊時未 蕃釐休訪空觀只解優曇
一現頓成憔悴白燕來時誤入衆香叢裏映簷牙銀蒜
交垂傍畫壁玉叉同倚夜沈沈夢掩梨雲小窗燈影細

周天度

字心羅號讓谷仁和人乾隆十七年進士
官至許州知州有十韻齋詩集四卷詞附

南歌子

湖上早春

山曉疑含黛，湖明曲映沙。碧羅天遠，畫樓遮樓外，數株
烟柳不勝鴉。繡箔銀蟾捲，紅闌亞。字斜春風日日到，
牕紗漸有賣錫人，插擔頭花。

鳳凰臺上憶吹簫

天澹魚雲，月斜寒兔，雁聲新過南樓。拚幾番微雨，併做
清秋。望裏銀塘水滿，蓮衣淨、綠減紅收。關心處，是疎砧
敲夢，長簫鋪愁。悠悠一般情緒，問頭白鴛鴦，何事
中流。空淚凝北渚，目斷西洲，轉盼重陽近也。對黃花開也，
應羞羞成怨。東籬曉來無限，停眸。

浣溪沙

海棠

苑柳絲絲綠未濃
暖雲斜日愛微烘
粉花融處卸金蟲
銜勅謾求花鳥使
彈箏錯怨綺羅叢
沉香亭下繡簾重

董元度

字曲江平原人乾隆十七年進士授庶吉士後改官教授有春雨草堂詩八卷詞附

百字令

題周李和進士畫冊

珊珊鴻影憶尋芳
杜牧三生一面十載揚州初夢覺
又向畫圖新見半
暈紅腮低頰綠髻
屏障春風軟關心何
事慵將玉笛重撚
華筵記否當年玲瓏一曲字字曾
親按此日停眸嬌不語
閑煞紅牙象板公子飄零美人
遲暮一樣柔腸斷
沉檀香炷真真我欲頻喚

謝

墉

字東墅嘉興人乾隆十七年進士官至吏部侍郎

憶舊遊

題談薈圖

憶秋槐古巷兩度吟壇壁盡蠻箋忽忽春明路倩丹青
妙手譜取談元閑情更揮松塵風月快無邊歎流水韶
光紛紛舊侶半已華顛 翛然素心客共盤桓佳日欣
賞鴻篇小別三壺上復夢中占夢握手江天剪燭重題
前事明發又離筵問莢圃生涯何時對面參畫禪

周大樞

字元牧山陰人乾隆元年薦舉博學鴻詞十七年舉人官平湖縣教諭有調香詞一卷

西地錦

西河柳

一騎青絲馬尾向風前旖旎眉兒太細腰兒太瘦照銀

情流水 秋雨陰陰欲墜看柔條爭起微顙更好微香
更好勝隋堤千里

汪士通

字子亨黟縣人乾隆十八年舉人官蕭山縣知縣有延青閣詞二卷

青門引

梅花

十里沿江路昨夜東風飛絮枝頭凍坼野梅香是花是
雪不辨雲深處 揚帆獨自開船去驚起花間鷺暗香
水面浮動江天寂寞開無數

酹江月

同徐俠亭嚴東有錢杞原張峽琴陪夢謝山先生西園晚眺卽餞別王述庵曹習庵諸君

石榴花發倚欄杆扶醉薰風亭榭對面君山烟漠漠一

帶空濛如畫層疊城陰高低野樹嵐翠遙相射披襟共
賞放衙人喜休暇笑問西府賓僚高談雄辨又酒闌
歌罷蹤跡泥鴻渾莫定經幾水流花謝雅集名園當年
良會想是同今夜柳堤烟渚歸帆明日同挂

攤破浣溪沙

綠暗長隄水氣蒸和烟和雨坐蒼鶩二十四番花信快
又清明 故作東風真狡獪吹開吹落太無情鎮日傷
春渾似夢惱啼鶯

醉花陰

題復齋叔過江遊草

蘼蕪綠偏江南路燕語鶯啼處隨地得勾留臨水登山

直向瓜洲渡 明月二分成小住
管領烟霞趣勝蹟紀
曾游帽影鞭絲又過紅橋去

少年游

海陽書院訪徐十洲兼晤家經耘查英石
即題其持贈蘭竹畫冊

長干廿載記前游
花落不勝愁
白板橋邊青谿渡口風
雨酒家樓
重來話舊成清賞
開卷墨香浮
九畹滋蘭
萬竿修竹併作草堂秋

王鳴盛

字鳳喈號西泚嘉定人乾隆十九年
進士官至光祿寺卿有謝橋詞二卷

綺羅香

闌干

略約塘邊采恩樓上曲折排成屯字十二遙連紅照一
渠春水帶明月涼影輕移傍高柳殘絲曾繫想當初翠

袖凭時玉人垂手擁雲髻 天涯此際別久回首屏山
六扇離思難理江館風湍花藥半荒殘砌空拍檻舊夢
誰尋漫當牕亂愁無際待何年虛幌閒庭卷簾還共倚
鎖牕寒井

風颭疎簾烟浮斷砌一泓凝碧波瀾不起昨夜露挑纔
圻凍銀牀徐牽素絲轆轤低轉輕冰滴記夢迴綃帳寒
漿汲到粉香都拭閒憶添悽惻奈鬢影春風便成陳
跡銅餅失水落葉暗飛檐隙冷雙桐照影誰人荒涼瑤
甃空似昔伴箏弦絡緯啼秋刺苔花愁寂

虞美人

羅幃當日梧桐雨。被同聽處。髮香酒醒。夜如年點點。
聲聲吹到枕函邊。祇令獨宿空江岸。淺水蘆花。畔瀟
瀟幾陣。打孤篷。夢短燈昏。天外叫征鴻。

漁家傲

淺夢輕寒添酒病。膏肓怕問梨花信。走近玉臺肩卻並。
窺明鏡。相憐愁對春風影。愛看月華彫檻凭。丁寧薄
薄衫兒冷。小膽不宜耽。寂靜燈將燼。側身單枕和衣等。
蝶戀花

南浦潮痕烟草接。淚滴長亭。都把香塵濕。翠柳千絲舟
一葉。離情渾似山重疊。月地雲階春夢怯。花外東風。

驚散雙飛蝶梁燕歸來愁語咽畫羅減盡湘裙摺

轆轤金井

寄題述庵弟三泖漁莊

露簾烟檻傍南邨自結矮香茅屋簇簇菰蒲罩幾叢寒
綠風流舊躑應直繼玉山金粟海內文章江干車馬欸
門相續橫雲數峰秀盡看秋嵐潑翠影落谿曲岸幘
匡牀檢奇書恣讀漁樵路熟待過訪挂帆半幅笑向西
窗燈明酒醺醉鄉同宿

臺城路

家穀原比部曩在秣陵嘗夜泛秦淮送客
入蜀時商寶意寓河樓倚闌吹笛遂邀作
梅花三弄而別命畫師作青溪邀笛圖爲
題此詞

西風長板橋

頭路衰楊絮痕都捲月腳低垂波鱗碎疊

一鑑冰奩平展鳥篷乍綰話劍樓離程越吟愁伴何處
高樓露寒雲咽噴羌管 伊涼清夜按徹更紫牙催拍
梅蕊飛徧前事如塵畫圖重省我亦舊游頻換冶城遙
岸記聽雨層闌門茶深院回首江南水天歸夢遠

摸魚子

春暮同警儒放船婁門經沙湖口泊舟登岸閑眺移時頗極卹野之趣同舟卽事遂填此解

湖婁江蘭橈並載麴塵飛滿香絮翠羅衫薄東風軟擣
手淺莎徐步芳草渡指斷激平沙約約春潮去輕陰閣
雨看麥浪吹寒袂針似繡乳燕掠波語 探幽徧殘碣
孤墳方礎靈祠叢社卹鼓憑澆一盞梨花酒小立斜陽

自唐言集卷三十一
催暮歸去路又幾點疎星眉月生南浦蓬窓細訴筭筆
架書籤粉奩鏡檻覓個結廬處

王天發

字毓駿太倉人布衣
有夢花絮語三卷

倦尋芳

聞歌感舊

翠屏倚玉犀盃浮香前度歡宴醉撚花枝人在曲廊深
院秋水波圓雙鬢側春雲袞卷輕紅見陡分攜悵棲鴛
未穩宿鶯驚喚念花靨隨風飄泊魚渚波沉燕梁塵
滿別岫離雲偏是歲華頻換楊柳絲殘空憶往芙蓉霜
老羞重看但攜尊聽清歌一聲淒斷

西子妝

弱絮成塵膩香流水零亂芳郊春暮烟江畫楫響初沉
趁輕舸載花先去鶯歌燕舞奈都被東風隔住甚來朝
又晴絲蕩漾粘人如許 心期誤一曲離愁彈入哀箏
柱不堪酒冷燭花搖帶柔情豪氣千縷江郎秀句凝別
恨綵毫爭訴任紛紛笑我間情一賦

探春

冷香徑

霽雪封條凍雲護蕩芳園花信春蚤溪影橫斜月香浮
動三徑破寒初埽翠羽啁啾夜費幾度行雲先繞扶筇
曉踏蒼苔清露點衣香鼻 何遜詩情未老趁東閣餘
閑次第吟到竹外癡情牆陰覓句呵筆不嫌寒峭巡簷

賞罷羣花夢風摧覺歛灑金杯莫待一聲霜曉

國朝詞綜卷三十六

青浦王昶纂

王又會 十八首

凌應會 四首

查禮 六首

董均 一首

顧詒祿 二首

張玉穀 二首

黃庭 二首

唐司衡 一首

張洪謨 一首

張夢階 一首

沈超 一首

王又會

字受銘號穀原秀水人乾隆十六年召試賜內閣中書十九年進士官刑部主事有

丁辛老屋
詞一卷

真珠簾

槐花小店鞭絲墮感芳菲壚畔盈盈三五乍握黃苗早
自暗通眉語鏡裏芙蓉描不得但細看綠嬌紅嫵行旅
惜劉郎歸後芳菲誰主惆悵尋春遲暮悔扁舟不載
五湖烟雨莫要泣春風把年華輕誤一夢三生今十載
更愁記夜涼風露休顧怕寄將紅豆賺伊淒楚

西江月慢

懷偶同

懷人渺渺剛一葉飄來庭樹晚色靜蟬吟牽牛花底嫩
涼微度傍小樓招手西風便勾離恨重提懽緒奈故人
隔个關門惆悵斷魂賦料此日尊鱸情更苦縱算是

儒冠不誤鏡裏吳霜消不得更淡烟疎雨但暗憶殢酒
東軒共看江月共聽街鼓恁別後夢斷楚雲無續處

臺城路

乙丑上元里中諸子紛紛然遠行余亦有永
嘉之役感念離合悵然填此

斜陽一片春鴻影東風可憐吹散綠糝落衣黃飄柳線
剛是燒燈庭院齊擎酒盞奈花外提鞭遽成離譙飲罷
迴看醉顏不似那時面相如游興正倦四三鷗鷺侶
不與相伴橋堍簫聲江邊賦手一例天涯羈絆吟魂頗
遠判去臥池塘好山題徧撒下荒廬任他巢社燕

東風第一枝

柳絮

欲起翻眠將疎轉密因風搖蕩如霰初飛送客江橋又

入詠詩庭院因風乍轉倩百丈游絲難綰漫輕狂彈指
三生夢遶白蘋溪岸休逢了香番花瓣重撲到那時
人面舞來倦繡文簾點入畫眉芳硯年華催晚怕愁損
傷春心眼試倩伊問訊江南好在謝家吟管

掃花遊

綠陰二首和中仙韻

淒綿巷曲漸雲暖烟昏亂楊如掃鶯身嬌小記萬花遶
閣那回尋到一逕蘼蕪認取羅裙色好怎知道被葉重
子低遮却多少闌立人悄悄但穹翠浮晴瀟陰拖曉
舊情錯了怕脂殘粉賸鏡心偷老徧覓餘香雲眼鉏車
去杳恁懷抱又催歸一聲林鳥

又

小庭似幄早卸了鞦韆掃清紅雨芳心在否被盧家嬌
燕盡情銜去弄蕊攀條不省濃粧那樹黯凝竚但一片
綠雲圓得如許芳讌知甚處更老却尋香蜨蠶無數
草池晚步任遮遮密密碧深無路笙管慵拈只剩嗁紅
杜宇望平楚最淒涼客中春暮

解語花

剪綵

椒盤罷頌柏酒微醺慵理鬢鍼縫試燈亭館沉吟坐整
頭鬢釵綴燕輕寒未餓知剪處葱纖定嬾菱鏡開華勝
親簪現出宜春面愁憶玉梅小院道勝

平聲

常初了何

事消遣斷縑零絹裁量細驀地惱人心眼天涯旅倦應
揣得者番清怨孤夢遙飛傍粧臺看萬花飄散

憶舊遊

一臥瞻園春向暮矣漁川賦寄此闕烟綿
霧絨帳觸旅愁輒用張玉田詞韻卻簡

甚飭簫一縷裊霧吹雲管到愁邊正作江南夢被空簾
喚覺羈旅山川酒旗水村飄處那偕典衣錢奈細馬吟
春輕烟翠柳誰共尊前堪憐小園裏但燕蹴香泥罵
滑流泉悵望鄉關杳賴楚江雙鯉遙遞吳箋苦憶兩湖
烟雨雙槳載花船怕彈淚東風青衫染就紅杜鵑

齊天樂

登朝天宮飛霞閣次玉李韻

東風扶上春雲頂回頭九龍街小雁背橫晴欄腰靠晚

驀記枯筇曾到飄然木杪認無恙江山那回清峭俯仰
蒼涼斷霞一片颺斜照 匆匆勝遊過了冶亭無限樹
零落多少玉笛飛花銀笙喚月悶拉黃冠憑弔狂來脫
帽把萬斛牢愁盡輸孤嘯鶴夢驚廻幾聲清怨繞

望湘人 題述庵三泖漁莊

乍涼波動絕高柳喚蟬好秋飛墮圓泖穩縛香茆淨占
翠島儘許乾坤長嘯閑帶簑簑自拏舴艋稱身較打把
釣竿低拂珊瑚那放游塵吹到 九點青螺縹緲但雲
山韶濩曲終人杳恁海雨江風消得此生懷抱叢蘆作
雪冷霜衫帽忽憶前盟鷗鳥待甚日去覓漁兄肯偕筆

牀茶竈

高陽臺

吳荀叔招同蔣晴壁陳寶所小飲寓齋荀叔賦此闕轍爲繼聲

柳綫黏鶯苔衣襯蝶軟紅不到花深一曲迴欄相思肯
厭頻臨商量便脫寒衣典要東風喚熨眉心泥芳斟免
使春歸驚地揅尋酒人燕市飄零盡怪酣歌擊筑邈
矣餘音壯士江山還容我輩題襟恩恩卽怕春光老想
胭脂漸染西林謂惻忠寺海棠待行吟萬一湔裳人在烟濤
望湘人題吳門女史徐若冰映玉南樓吟稿後

正蟬琴曳響蘭箭逗芳絲槐高館深夏沁雪抽思敲冰
琢句顛地清涼遙借扇詠班姬絮吟謝女最羸風雅想

玉臺翡翠琉璃鎮日隨身瀟灑

還憶南樓多暇恁書

牀鏡檻淨明如畫料帳遶青綾未待剪刀工罷裁雲縷

月嚼花含蕊織就雲機無價算不是萼綠華來那與飛

瓊相亞

集中多與雲清夫人唱和之作雲清姓許氏名玉晨

齊天樂

題江雲谿杏花影裏填詞圖蓋取陳簡齋杏花疎影裏吹笛到天明句也

十年家近紅橋住江郎最饒詞賦雪盡長溝烟低故苑

偏聽玉龍橫處新腔自度正草長江南小樓春雨短帽

茸衫忍寒獨夜向誰語東風暖催那樹幾枝疎影裏

聲裊如縷換羽移宮含葩嚼蕊半爲知音吟苦花陰月

午怕牆脚潛行有人偷譜莫恁孤吹小紅低唱與

東風第一枝

雪霽同沃田鏡香渡江歸舟作

樹暗南徐霞明北固千山霽雪如練遠疑粉彈偷勻近
知翠膚弄暖船頭注目直送盡離亭長短算渡江幾徧
荒寒未抵者番清怨春到也歲華剛換裘敝也酒痕
未浣倚篷冷擘紅箋剪燈滿傾碧瓊歸心遙去但恐負
東君青眼待甚時飛上金焦喚取玉龍重按

凌應會

字祖錫號裕圃上海人
乾隆二十一年舉人

霜天曉角

題對琴詞

松風吹去秋滿瀟湘雨試聽無聲絃指誰領得此中趣
遙夜淡香縷月明垂葉露彷彿刺船東海又目送早

鴻度

憶舊游 題看雲閣七夕小冊

乍風飄金井月冷瑤階前度穿鍼遲了中秋信又銀河
碧落佳約重尋記得那人無寐羅扇撲流螢歎錦瑟華
年黃楊時運慣看雙星 沉吟是何夕便海傾宮漏祇
到天明謾說重逢好却添愁添恨多此離襟幽詩一同
拈出長繫故園心早白露催寒聲聲急擣涼夜砧

揚州慢

平山堂餞辛楣入都同黃谷對葉作

依淥園亭夾隄樓閣繡成十里揚州悵歐蘇不見落我
輩扁舟問當日紅橋一曲黑頭仙侶能說前游向斜陽

如此江山還倦登樓 柳條又折算萍蹤何似沙鷗便
十日平原題襟載酒難遣離愁竟踏軟紅香土烟波渺
誰譜蕢洲但三分明月蘆溝同照那溝

憶舊遊

由細林至鳳凰樓雲諸山憩涇南張司寇園同對栗作

到宿雲一塢風滿空樓桂發空山試問蒼髯幾恁梅殘
菊老閱歷年年我亦幾番游款佳處儘盤桓看壁上龍
蛇依然飛動日落天寒 樽前攜仙侶按蕢洲漁笛刻
燭分箋悵望林泉好把華亭唳鶴都付啼鵲十年嬾拈
詞筆霜葉滿蒼烟待寄與江倫涇南重放秋水船

查

禮

字恂叔號儉堂宛平人監生官至湖北巡撫有銅鼓書堂詞二卷

琴調相思引

水西莊納涼

葵扇蕉衫坐小亭空池水活亂蛙鳴夕陽西下涼入柳
絲汀月出不知荷露重雲生只覺竹風輕流螢幾點
明滅上桃笙

八聲甘州

滄州舟中與貢木先生話舊

漸青青弱柳繞長堤村落夕陽紅聽呖啞柔櫓高低漁
唱嘹唳哀鴻晚過滄州城外烟景正愴濛卻喜故人至
同趁春風一甕麻姑陳釀向吟邊細酌共醉烏篷話
十年往事如夢去匆匆有幾番天涯聚首有幾番彈淚
別西東孤燈下華牀茶竈月色朦朧

小重山

詠新月次汪西顯徵君韻

夕照猶明池上樓
玉蟾初出海
霽霞收相看長是曲如鉤
空庭外誰唱大刀頭
紈扇小螢流
桂花香不斷五
分秋一更催去起離愁
銀河淨惟見數星留

丁香結

水西莊飲丁香花下寄杭大宗

晴雪連帷紫雲成
葢又是晚春時候正
小苞含透似葉底一一風鈴輕逗
亂香吹不斷重階靜暖蜂去驟低徊
無語未許遜卻封書豆蔻
回首望十二銅街幾處濃
烟遮柳刻燭吟曹蕨鉤酒伴夢魂依舊
松吹堂畔倩影想也紅如繡
問花邊俊句肯向雙魚寄否

減字木蘭花

兩夜有感

愁雲闇淡永夜重門和夢掩落盡簷花來日苔痕一逕
斜殘燈滋味不是當年羅帳意雞唱聲聲誤道天明
又未明

探芳信

二月七日寓館升庵有櫻桃十餘枝招吳
冲之學使顧華陽觀察陸赤南山人飲花
下分賦

夢晴晝乍燕語呢喃東風倏憇恁狂吹花信朱顏對鄰

園

花生籬外地爲
護國庵之園

瓏璁幾樹烘崖蜜小白隼吟袖羨林

邊纈影穿籬粉痕黏蟄邀客急呼酒念檐外春寬樽

前人舊徙倚芳叢不比塞垣柳歸來便有看花分澹月

相攜手待輕紅萬顆勾圓似豆

董

均

字平銓婁縣人貢生官無爲州訓導有疎庵詩餘

鵲踏枝

嵇阮壚邊司馬壁檢點平生多少閒蹤跡客裏亦家家
亦客近來心緒誰知得靜處思量頻淚滴何事撩人
更有山陽笛一夜梅花催放白天涯芳草無窮碧

顧貽祿

字祿百長洲人諸生有二如庵詞鈔一卷

如夢令

曉起

昨夜雨聲成陣一霎小園紅褪曉起不勝寒薄病和花
俱困休恨休恨簾外綠楊風定

滿庭芳 芍藥

柳絮飄殘荼蘼開罷數枝婪尾舒妍翠蕤紅萼朝露浥
尤鮮歲月難堪把玩聽樹上愁殺啼鴉閑過却春光九
十彈指一年年 傷心懷往事豐臺似錦游騎喧闐共
二三舊侶醉倒壚邊廿載音塵如夢風流散半沒荒烟
空存在青袍未換霜鬢杜樊川

張玉穀

字蔭嘉吳縣人諸
生有樂圃詞二卷

如夢令 冬閨

夜靜雪光穿牖自下重簾停繡睡鴨縱熏香輾轉孤衾
寒透知否知否人比梅花還瘦

春光好

屏翡翠帳鴛鴦夢魂香此景不堪回首怯空房
烟鎖芳堤草色風搖綺陌花光難道眼看春似海不思鄉

黃

庭

字夢珠錢唐人
監生有零香詞

婆羅門引

耳似

花團翠陰一絲水影界橫雲最憐紅到香輪移近秦璫
輕撚頰蹙遠山痕正纖纖碾落玉屑續紛
貂茸未分挑不起翠鈿溫插向芙蓉蟠處越樣銷魂量來幾寸怪
搔頭碧縷樣翻新幾番見細撥宮薰

三姝媚

巾束

湘紋搖曳處織絨絲迴文約時清楚幾幅水綃似疊成
雲浪月絃封住宛轉回環難挽定相思千縷曾記花前
纔打鶯兒又紫飛絮常是踏春游去到醉後重量酒
痕如許一捻玲瓏怕東風還緊欲垂旋舉界定珠塵渾
不管流黃微露愛煞紅潮初拭平分香雨

唐司衡

字拙園江
都人監生

賀新涼

潞河旅次同對琴作

垂柳悵悵綠試喚取輕舸野泛波紋似縠山抹微雲天
貼水彷彿鑑湖一曲美此際襟懷不俗蘆葉參差抽浦
瀨趁平沙暖處鳬翁浴算只少風敲竹中流頓豁烟

塵目見了了遠村蕭寺酒帘茅屋岸上牽船多別趣稚
子驅來黃犢更搖漾野花幾簇塔影憑虛當檻落記春
明游歷剛三宿又蚤傍遠橋盡

張洪謨

字大文嘉定人有冠
花樓小草一卷詞附

如夢令

閑裏春光欲暮滿眼落花飛絮愁絕路三千莫便征車
徑去且住且住此後相思雲樹

張夢喈

號遜亭江南
華亭人貢生

風入松

秋感次幻花季父韻

烟痕月影上簾櫳涼夜半牀空玉人去後無佳夢怕敲

窗葉趁西風一縷香消古鴨數聲相斷幽蛩男兒原
是可憐蟲蝸角漫爭雄安涼遞換成衰老任英雄今古
相同花底且開笑口酒邊休帶愁容

沈

超字贊思錢唐人諸生
有藕絲集一卷詞附

長相思

酒初醒睡初醒燈影挑殘天未明孤衾傷客情夢難
成句難成一枕淒原木可聽風聲雜雨聲

國朝詞綜卷三十六

國朝詞綜卷三十六

國朝詞綜卷三十七

青浦王昶纂

過春山 二十首

朱昂 二十四首

江立 十七首

江聲 三首

過春山

字葆中吳縣人諸生有湘雲遺稿二卷

吳竹嶼云湘雲倘伴山水肅詠風月所作詩詞如雪藕冰桃沁人醉夢

明月生南浦 河橋泛舟同吳竹嶼賦

宿雨收春芳事盡綠漲溪橋花落無人境幾點萍香鷗

夢穩柳綿吹盡春波冷 溪上人家斜照影招手漁竿

煙外浮孤艇回首桃源仙路迢一聲欸乃川光暝

踏莎行 游秦園

寂寂簾櫳深深院宇碧桃花下聞人語
閑情尋遍小闌干東風猶裊餘香縷
酒外啼鶯鬢邊飛絮夕陽山色
愁如許游絲不解繫春留爲誰偏逐香車去

疎影 爲張古樵賦豆棚

夕陽草舍蔭滿地碎陰庭戶瀟灑屈指西風一點幽香
占斷短籬修架新梢細補貧家屋怯露重幾枝低亞最
愁人款住秋聲坐對雨昏燈地長記南山種罷荷鋤
歸帶月獨酌簷下好是新涼密護吟蟬不與霜林同謝
清齋謾挈筠籠去試小摘冷烟盈把掃蒼苔拂簞烹茶

呼取隣翁閑話

柳梢青

螢

尋幽棲曉簾幕陰移琴書光冷梧葉飄時荳花香裏一
番清景 蕭疎暗度深更更照水窺林不定昨夜霜清
相逢誰在撲花幽徑

水龍吟

太湖晚泊

片帆斜挂西風水雲捲盡秋無際沙聲擁沫波光弄暝
一痕新霽散髮臨流扣舷長嘯滿身空翠悵釣徒去後
烟波冷落憑誰唱漁歌子 青筇綠蓑容與倚斜陽亂
山如此鱸香菰冷幾番付與眠鷗夢裡一點閑愁欲採

蘋花相思誰寄最難堪此夜短篷新月聽征鴻唳

探春

月夜飲荒祠水木明瑟池館蒼涼主人告子
日此鄒副使愚谷十二樓址也聲伎豪侈久
衰歇矣感而賦此

小雨啼花深烟怨柳往事倩誰重訴
冷銅瓶塵封玉鏡試問荒溪鷗鷺說起那時恨又恐怕鶯愁燕苦醉餘
一點閑情立盡闌干涼露殘月三更南浦想山鬼清
游木蘭微賦金枕生苔漆燈無焰應是不勝淒楚歎一
番春夢長堤外落紅無數記取明朝莫上危樓高處

水龍吟

西湖泛月

斜陽送盡歸航蘋花香冷滄波杳西陵橋畔鷗鷺自語

應悲孤悄露色侵衣水光動柳持竿長嘯更臨風散髮
舉杯問月瑤臺路何時到 回首孤山雲峭空凝望古
堤深窈危峯萬疊浩歌歸去蕭然懷抱橫笛吟商采芳
贈遠舊情已渺料山園鶴怨猿驚一片綠陰誰掃

瑞鶴仙

晚游孤山尋和靖先生墓

抱琴尋斷碣正斜日初沉亂烟凝碧蒼苔舊行跡想沙
鷗高致似曾相識閉情暗覓指秋墳樵蘇能說歎寒梅
零落東風閉却一溪明月 悽惻西泠春晚天竺雲深
空懷孤潔荷衣未葺天涯愁倚岩石念幽人去後峯南
峯北多少啼猿喚客黯傷心欲薦江蘼夜涼露白

臺城路

登雷峯望宋勝景園故址

東風又入荒園畔繁華已成塵土太液芙蓉未央楊柳
曾見當年歌舞危欄謾撫歎事逐飛雲夢隨香霧指點
江山斜陽一片下平楚悠悠此恨誰訴想青燐斷續
還過南浦鐵馬憑江香車碾月忍讀昭儀詞句淒涼幾
許但山鬼吟秋杜鵑啼雨回首宮斜白楊深夜語

倦尋芳

過廢園見牡丹盛開有感

絮迷蝶徑苔上鶯簾庭院愁滿寂寞春光還到玉闌干
畔怨綠空餘清露泣倦紅欲倩東風泥聽枝頭有哀音
淒楚舊巢雙燕漫竚立瑤臺路杳月佩雲裳已成消

散獨客天涯心共粉香零亂且盡花前今夕酒洛陽春
色匆匆換待重來怕只有斷魂千片

清平樂

雨輕風細小院深深閉夢醒餘寒侵翠被又被啼鶯催
起悄然微步香堦柳塘斜日初開數盡落花無語黃
昏雙燕還來

柳梢青

春日書懷

落水流花深沉院宇寂寞年華幾度消凝樽前歌舞江
上琵琶淒涼況是天涯凝望處荒烟斷霞綠樹啼鶯
紅樓飛絮春在誰家

更漏子

半開簾斜背燭困倚書屏新浴眉淡掃髻低梳夜涼生
繡襦 秋聲驟雁來候人共海棠消瘦香乍熱簾微寒
魂消似去年

臨江仙

秋柳

試數舊愁餘幾縷暮蟬淒斷西風蕭疎無力繫游驄津
亭攜手地夢逐曉霜空 似與玉樓人比瘦翠痕都減
眉峯多情只有晚烟籠秋聲吹不盡長笛月明中

玉漏遲

月夜

夜窗明月峭寒侵翠幌博山香裊風觸簾旌一片疎陰

輕掃冷露暗吹衣袂空望斷碧雲縹緲芳信杳欄杆倚
處倦聞鶻鳥青溪幾度清游想燕子人家綠波空遶
好景匆匆依舊翠深紅老爲問素光千里甚偏向文園
孤照情暗惱銅壺又催春曉

一枝春

同吳竹嶼賦招張古樵諸子

綠柳池塘暗流鶯啼散一簾絲雨東風如許喚起舊游
情緒晴綿吹少料難禁好春歸去念故人門掩梨花靜
對冷香無語留連翠微深處記梅邊弄笛滿身花露
盈盈春水爲問采蘭誰侶芳期暗卜想猿鶴空山無主
試聽取香逕啼紅又催杜宇

月下笛

春游武林寄別諸子

野館寒輕春衫瘦減倦聞鶉語斜陽外無限離愁亂飛
絮尋芳尚記西園路問燕子春還幾許正津亭潮滿蒼
烟一碧峭孤帆去 回顧蘋花渡嘆送盡流紅舊情難
訴漁村解舍伴人惟是鷗鷺一舸長日依烟水那更識
飄零小杜漫竚立數歸心腸斷孤山細雨

綺羅香

湖上聞歌

舊恨消香新愁倦酒寂寞又驚春晚小立斜陽何處暗
飛銀管有幾許離緒吟秋怎知我天涯腸斷莫隨風吹
入西冷爲渠喚起故宮怨 霓裳遺曲曾譜悵望壽鸞

已杳彩雲消散剩粉零紅忍向尊前重見消幾度月淡
窗寒更那堪夢圓人遠指青袍今夜愁痕倩誰江上浣

江亭怨

西泠晚渡

寒翠濕衣欲暮烟際亂山無數露滴宿鷗驚飛過沙洲
自語欲摘白蘋寄與幾點鳴簷絲雨雙槳趁潮平載
取江雲歸去

西子妝

雨中坐放鶴亭眺湖光山色感而賦此

露滴松梢泉穿竹徑一帶疎陰催暮凭闌目斷白雲深
但蕭蕭滿身香霧閒情欲訴悵荒渚難招鷗鷺俯滄浪
歎荷衣誰浣天涯塵土佳期誤落盡梅花寂寞誰爲

主玉琴彈破碧天寒
問東風鶴歸何處重尋舊址謾
得蒼烟冷雨黯銷魂
入夜啼鵲更苦

朱一昂

字適庭號秋潭休寧人寓居長洲監生有緣陰槐夏閣詞一卷

菩薩蠻

碧雲如水蛩吟砌
簫聲月底重門閉
涼露濕芙蓉
背窗燈尙紅
銀河光隱隱
料是星期近
望到曉天秋
寂寥仍倚樓

杏花天

玉樓簾靜誰家院
似相識新巢社燕
綠楊烟鎖愁如綫
閑倚闌干春倦
早又是刺桐風顛
最惆悵碧簫聲遠

桃花隔浦烘霞片想像去年人面

浣溪沙

蕙鼎香微掩畫屏醺醺架外月斜明誰家簾閣夜吹笙
憶自春濃圓好夢拚他花謝引柔情那堪重聽杜鵑
聲

一剪梅

一樹細桃浥露穠開也東風謝也東風星期蘭約記惺
忪攜手忽忽分手忽忽黃鳥呼人午夢中半掩房櫳
半捲簾櫳菱花羞改舊嬌容簪墮愁紅粉滲啼紅

清平樂

題三泖漁莊

芙蓉九朵巒翠溪雲鎖月落舟橫人醉卧隱隱蘆中漁
火幽棲竹屋松棚生涯茶譜魚經最愛門臨沙港霜
天好下寒罾

夜行船

吳江寄憶

雁度江樓聲慘切任飄蓬客舟如葉古驛梅香釣灘雪
霽誰奈試燈時節昨戀鴛衾寒尚怯料紅闌此情難
說夢掩雪屏影窺寶鏡魂斷曉風殘月

一攤破浣溪沙

閨病

藥鼎微溫枕半欹不曾中酒眼迷離憶着傷春斷腸句
總無題弱絮輕萍愁似水曉風殘月命如絲簷馬丁

東燈燄小五更時

明月棹孤舟

潞山湖夜泊

蔓草荒汀帆影直望不到五茸城北山驛橫雲津亭卧
柳遙映水天同色小繫烏篷沙岸側奈此夜酒酣狂
客蛙吹愁喧漁燈夢冷飛月一九孤白

祝英臺近

少華來自寒山留宿蘋花池館同述庵
紫岑叔聽雨和竹嶼作

小亭南花信晚霧暗綠陰重良夜挑燈且喜故人共最
憐透水新荷一池秋響定驚起鴛鴦幽夢畫簾控坐
愁細滴芭蕉波痕曉風動遙想山樓淅淅瀑泉湧幾時
更放蘭橈同攜茶臼翠棹裏乳鳩晴哢

天香

龍涎香

蜃市盤雲蛟宮湧沫孤棲海月初滿乍探驪珠還批黛
甲試取鳳團勻碾沉烟小炷忽散作紗窗細篆薇露霑
衣夜悄蘭膏醉人春暖 芳釵惱花歷亂畫簾垂鬱金
堂畔隱約麝熏微度燭華頻剪韓椽風流未遠待換火
筠篝伴幽館繡被餘溫燈昏夢短

花木考宋代宮燭以龍涎香貫其中

又淡芭蕉

閩島香苗蠻荒翠卉移來遍種瑤圃小貯筠箱初停海
舶巧製謾抽金縷輕寒薄醉恁解釋相思意緒殘夢沉
吟倚枕雙鬢點燈低語 修廊幾回覓句試牙簫隔簾

花霧記否繡囊閒展玉纖拈取隱約朱唇啟處看一朵
巫雲暗飛去茗椀纔收蘭膏細吐

陌上花

燕泥

湘簾半捲空梁塵網小樓疎雨草碧芹香剛把艷情銜
去斷垣廢井誰家院片片飛花沾絮待歸尋故壘不堪
回首舊時朱戶念雲衣冉冉新雛乍乳落地香痕無
數繡倦紅閨誤認玉孌絲縷綠陰紫陌雙棲影還入海
棠深處惜芳菲恰受輕風高下掠波春渚

陸游詩海棠
花入燕泥乾

瑤花

茶花

霜華小摘石薺初抽似梨雲連陌孤村荒塢看一帶先

占玉梅標格踏歌游女料夢斷香魂難覓曾幾時龍井
烹泉憶殺粉葩狼籍擬箋陸羽遺經怕未識芳心愁
遞消息仙人露掌留嫩蕊誤認薔薇差白雪飛花老莫
再問洞庭山色剩冷齋閒話探春裊裊竹鑪煙碧

茶譜
當陽

縣有溪山仙人掌茶茶經花如白薔薇

徵招

涼雨初止虛堂殘燭颯然有秋意聞隣笛隨
風飄墮客有感於青衫余更悲夫白髮輒對
景倚聲一寫羈旅無聊之况俟同心離居者
和焉

碧梧深院新秋雨孤燈亂蛩鳴砌玉笛弄誰家正涼生
羅袂高樓人獨倚感多少吟商情味曲罷更闌天涯淪
落共傳心事蘋末暗香殘虛簾幙蕭疎敗荷風起短

夢已銷沉伴幽牕無寐斷腸聞水調怕彈盡江州清淚
白雲外早雁飛來憶錦箋曾寄

露華

予先爲述庵題三泖漁莊小冊今存懷復繪
湖莊春景湘桃細柳風景清麗因再填此解
題之

擁書小閣看碧柳籠烟紫燕巢幕帶草侵階開遍隔牆
紅萼客來滴露聯詩取次坐花觴酌風日美晴牕引琴
野圃調鶴 圓湖釣艇初泊愛結屋橫雲還傍溪壑遙
映斷橋流水酒旗簷角緩歌暗送韶華莫是討春行樂
芳徑掃劉郎未須寂寞

掃花游

辰

亂紅覆地趁傍午囊琴討春攜榼雨絲半霎正苔黏露
卯軟沙徐踏引鶴穿林歷遍吳山楚峽徑迴合待行藥
曳筇游興方洽 秧陂看荷鋪儘點染香泥繞籬花匝
齒根自蠟歎能銷幾度風塵蕭颯古磴荒祠松社憑誰
下榻試春袷過溪橋數聲鶉鴂宛委餘編舊爲屐者齒
皆達編上名曰露卯白
居易詩閑出乘輕屐徐行踏軟沙陸游詩引鶴時穿屐
元稹詩躡屐看秧稻范梈詩世故風塵雙短屐趙貞吉
華陰祠居詩烟花松社屐風雨竹床書

夢橫塘 鷗

候潮荒岸戀草平洲一羣棲宿湘月海上閒盟恁懶避
船頭雙楫蘋末香寒蘆中人靜夢魂清絕望烟波曉霧

萬里輕漚孤飛路滄江濶 忘機狎客遨遊正沙汀浴
罷玉羽低拂浦溆凝雲還記取碧蓮翻葉夕陽下雨餘
新漲浩蕩湖天歎飄沒野蓼殘秋水蒨枯梗又渾身風
雪南越志鷗在漲海中隨潮上下頗知風雲若羣飛至
岸渡海者以此爲候許渾詩眠鷗猶戀草杜甫詩春
鷗懶避船

淒涼犯 蘆花

秋高月淡荒江畔西風亂絮飄逐冷烟蔓草雲陰黯慘
晚鴻棲宿蕭蕭落木伴波影蘋香幾簇遠蒙茸苔磯路
暝微火出漁屋 追憶潯陽岸送客移舟老楓枯竹舊
游已渺更何人醉吟溪曲擁被寒窗剩烟水蒼葭滿目

曉霜天是處朔管響斷續許有壬詩淡月隱蘆花李端詩雲陰暗荻花楊維禎詩被
擁蘆花夢繞春

綺羅香 簾

風額嵌珠蝦鬚織玉半窳朱欄間靜縷縷爐烟纔透晚
庭花暝挽柔荑銀蒜參差望新月玳鉤斜整訂幽期僅
隔櫻桃有人潛向畫屏等芳時初過上巳重到輕陰
院落桐華飄徑蕩漾香波一桁水晶低映凝雨夢翠館
歌妍怯風情繡窗春冷甚無端飛絮沾衣寄愁雙燕影
元稹詩櫻桃花下隔簾看又桐花垂在繡簾前

探春 新柳

曉谷鶯遷春池魚躍殘杏幾番花信綺陌辭寒纖條弄
色縷縷和烟輕嫩況一簾絲雨早又是清明節近更憺
灞水橋邊天涯重寄芳訊怕見落紅成陣記愁損宮
腰去年春困翠閣凝妝長亭試舞玉笛細吹清韻眉嫵
含情處應多謝東風牽引珍重韶華休教香絮飄盡

惜秋華

山塘泛舟和述庵習庵

亞字城西正蒹蒼露白盈盈秋浦波冷斷萍山溪慢停
柔櫓同舟半是吟朋好整頓茶鐺魚罟容與聽孤蓬落
葉蕭蕭涼雨行過野橋去又采菱風急驚飛烟鷺水
檻畫樓曾記舊游題句回看塢影微茫向伴侶翦燈重

國朝詩餘卷二十一
語情緒寄清詞蕢州笛譜

玲瓏玉

王穀原秀才泛舟秦淮攜歌酒餞客徘徊
丁字簾前時聞遠笛作梅花三弄碧天無
雲涼月在水痛飲達曙而別明年重游金
陵追摹前景因繪青溪邀笛圖自製新詞
屬余繼聲遂填此解

丁字簾波板橋外斷柳荒烟高樓倚逴夢圓月照長干
曲渚怱怱送客問歌橈酒殘零落誰邊堪憐算追游簫
鼓畫船燕子經年別去況重尋亭榭門掩苔斑舊雨
天涯遶離愁雲水漫漫南朝繁華銷歇惜清景蓬窗翦
燭點染江山聽何處水龍吟天碧曉寒

長亭怨

送述庵入都

聽何處啼鶯聲咽曉色津橋柳梢殘月岸綠蘼蕪亂帆
雲影半明滅短亭攜手經幾度青春別欲別證前因已
十載同心蘭雪 愁絕想挑燈畫舫定惜故交離濶輕
塵客夢抵多少渡江桃葉肯忘了泖水漁莊儘消受長
安風物囑素鯉賓鴻休滯緘情天末

夢橫塘

晚渡香溪泊舟濱上偶因感舊聊成此詞

春山雨歇野浦烟凝夕陽明滅深樹綠漲溪橋問底事
扁舟橫渡歌咽吳船梵沉蕭寺那堪遲暮況鷗眠鶴夢
靜夜寥寥增多少關心處 孤篷無寐沉吟只蘇臺在
望館娃會賦剩得漁蓑深自惜鬢絲如許念當日探梅

雅集鐵笛吹花暗香霧素侶飄零西窗情話向何時重
訴

江立

初名炎字聖言歙縣人寓居江
都監生有夜船吹簫詞二卷

疎影

賦黃梅花影

油牕日靜弄橫斜向背香外間映忽訝蠶衙放處渾癡
亭午亂迷寒逗風前睡意濃如酒到半額休教吹醒話
夢中倩女離魂恰恰嫩容扶病隔水低窺淡雅自粧
成越樣來踏明鏡欲折還疑著意描他薰月煎烟無定
因知不入羅浮夜別深隱道家清境似金人捧露罍盤
灑落淚痕疎冷

綺羅香

庚寅春自杭返廣陵作

影邨鐙孤香留酒滯短夢依然江表訪里尋隣贏得如
今懷抱待喚起踏月吹簫終不似籌花鬥草更關情游
倦歸來故人多少近來老 歡游曾步翠窈試託醉鄉
分付葢枝嬌小幾曲闌干莫問四愁三笑流水外風起
潮生柳影中燕昏鶯曉但依依譜拍新聲淒涼歌楚調

瑣窗寒

寒柳

冷月栖霞昏鴉啄凍斷橋寒浦銷凝幾日尙有剩條殘
縷畫斜陽蕭疎送秋轉思往日春愁苦恨韶光不住風
流銷盡鬢絲如許 離緒都無據過畫壁真亭不堪延

佇枯根野澗千里暮雲平處最凋零依依漢南有情可
憐如此樹待迷濛綠髮垂陰隔江吹暗雨

霓裳中序第一

宣和秋葉鏡追和詹天游

尙方鑄冰魄流出宮溝涵怨色一片閒愁暗怯想烟鬢
臨妝粉香指月宣和舊刻是趙家兒女銷得情驚處欲
尋且住望裏杳南北花減人間春別自悄照雲房過
客西風憐取落葉風塵靜無翳影留孤白怱怱忘故國
冷背面泥金字畫飄蕭甚吳霜初點短後見秋髮

百字令

夜渡揚子江泊舟金山下

孤雲海樹趁圓潮拍岸尙懸蒼暝三兩點鷗沙外月同

載烟波千頃山勢北來水聲東去一葉江心冷醉餘夢裏而今翻被驚醒一夜換却西風也應回首步履交枝徑憶著舊時歌舞地花影倒窺天鏡濯足吹簫吳頭楚尾未了清游興世塵空擾闌干來此間凭

惜紅衣

沃田餉蓮房賦謝

紫玉含苞青紗皺殼脆莖清濯小小房櫳偏愁啟花鑰丁軟折斷須付與柔荑輕剝交錯盤裏涼珠惜紅衣初落雲廊水閣銷夏湖天亭亭記曾握碧珪試揭菽發認依約一點苦憐心上幾寸冷絲空絡謝沈郎持贈香翠宛如秋萼

玉漏遲

吳君鳳亭招同杭丈堇浦許君默齋汪君秀峯冬夜集瓶花齋

釀寒風尙陡籬根掃葉霜紅隨帚梅意駿駿花下欲交
三九何遜而今暗老幸卻共故人攜手詩思逗溫硯灑
牋不孤吟袖佳處勝引留連添款語燈前湖山蒼舊
飛爵騰觥客裏頓忘腰痠數遍官哥汝定要一一卷波
呼酒殘夜漏飲到曉鐘敲後

齋中藏有百八酒器出以飲客

摸魚兒

硯農叔來自江村作此奉簡

送君歸落燈風裏春寒猶殢雙槳來時綠暗江南樹細
雨陰陰門巷攜手暢說飛布山光幾朶青無恙雲嵐瀑
漲看水遶孤村草堂前後碎玉亂飛響家園好花影

倚牆初放故人乘月招賞黏唇不計杯深淺瓶倒隔年
秋釀牽筋舫賦一闋離情襖被漁梁上愁余旅況問何
日誅茆萍根難定十載渺烟浪

揚州慢

紅橋感春

拍岸春波漫天晴絮曉來劃碎玻璃甚花開幾日已綠
重紅稀認簾影沉沉一片半遮垂柳相感年時又風前
人戀餘寒猶怯單衣曲游池館悵梨雲和夢都迷問
膩粉欄杆栖香燕子行過橋西杜牧客懷銷黯簫聲冷
夜月依依剩遙空山色江南吹上青旗

臺城路

丙申十一月二十九日集七硯書堂送春
渠春渚歸西湖

隋堤落葉紛紛盡來朝又催歸客離緒凭欄離筵剪燭
照見滿堂離色嚴寒側側指兩點金焦路分南北孫楚
樓頭雪篷停處夜吹笛孤山到時正好早梅添畫稿
月淡香白拚趁青旗定借素侶追逐逋仙蹤跡相將除
夕更兒女團圓春盤狼籍待寄雙魚盈盈烟水隔

憶舊游

秋窗茗話同人集牧田齋中

正松風灑翠石鼎飛紅來問君家冷客偏多事笑秋將
過半還門春茶自憐買山無計栖泊向天涯願乞研箋
愁移床借夢間送年華窗紗弄輕影蘸幾點殘陽淡
墨歸鴉最愛蕭疎意卷一簾清露涼到瓶花素襟淡如

雲液幽境隔塵譁躡屋後青梯遙帆歷歷空外斜

甘州

邦上逢蘅嶼上人出秋岡看雲圖索題卽送其歸南屏

問西湖湖上看雲僧何事賦飄零有一鏡鷗波一筇烟
草一幰秋屏拋却林中猿鶴江外打包行指點青山在
畫裏愁生 此際峯頭初吐正如綿似絮繚繞寒村忽
風前吹墮片影戀歸程算尋常無心出岫待攜來披向
最高層繙經坐染成花雨灑遍幽局

疎影

燈花

籠紗牕戶逗嫩紅隱隱孤艷徐吐細蕊如珠搖曳烟魂
不怕曉風吹去偶然墜落銀缸外是案上棋聲敲處又

續開漏永更疎宛共夜闌人語 因想蘭閨暗卜幾回
盼遠信佳約遲誤短夢醒時似黯還明瘦影依依低護
堪憐一點芳心熱但只少幽香飛度轉憐伊移近羅幃
畧遣相思情緒

聲聲慢

題陳老蓮畫斷橋妓小像

鬢籠薄霧眉襯遙山粉痕微逗相思無語風前珊珊覺
道來遲閒情愛擎團扇引輕涼慣入秋衣娉婷處是裙
拖六幅小步偷移 攜手湖天夜月况飲餘不醉醉也
休歸酒暈難銷願邊莫認燕支留得卷中人在悵楊花
身已沾泥重顧影對殘桃紅雨亂飛

摸魚兒

將之廣陵用送硯農叔韵留別汪比部魚亭

甚東園桑陰十畝未能爲客留住愁絲纏去盡難成繭
更比吳娘辛苦聽夜雨是瑟瑟蕭蕭絮作離人語疎烟
幾縷恍身在篷窗與鷗同夢涼影剪燈吐平生意多
謝方壺深注寄懷秋雁來處旗亭送我宜歌曲好約夢
窗填句謂吳丈西林紅藕路正銷夏輸將萬柄香猶故青天
白鷺指一幅西湖隨時入畫搔首費回顧

高陽臺

分詠秋雨留別邗上諸公

影帶雲涼聲和雁墮酒闌懶起挑燈耐是愁多那堪更
話離情當時月色連深院甚重來換了陰晴夜沉沉霧

國朝言系卷三十一
織烟籠吹滿江城 幾行攪得萍蹤碎又一番南浦一
度西泠篷背淋浪猶懸去後心旌瀟瀟唱出吳娘曲恐
天涯倦客難聽莫縱橫亂灑征衣淚已先零

揚州慢 迎秋

蕉雨鳴廊竹風開徑乍來便做疎陰算蕭蕭瑟瑟漫說
是而今認空外涼雲捲起夜窗如水含意遙深又天涯
幽夢醒時愁入吳吟 相思何處倚彫欄楸葉先簪正
紉扇停初蘭湯浴罷簾影沉沉別後更憐西子眉峯碧
淡到湖心待教他小艇衝波橫笛疎林

江

聲

字鯨濤吳縣人布衣嘉慶元年舉
孝廉方正未試卒有艮庭詞三卷

惠松崖云鯨濤少與過葆中吳企晉以詞倡
和逮專心經術輟不復爲而所存秀句名篇
並堪諷詠

邁陂塘 爲張古樵題五湖泛月圖

遠微茫湖光曳練澄清水面如鏡銀蟾乍湧遙天際七
十二峰烟暝風浪靜挂半幅蒲帆夜汎波千頃扁舟獨
遲任鼓枻中流嘯歌來去隨月弄清影 誰堪並茗雪
吳淞風景爭如震澤佳勝蓴鱸蓑笠生涯好都付與君
管領君獨醒把塵慮都消方寸冰霜淨披圖漫省羨秋
水蒹葭儘堪棲老引我共游興

玉蝴蝶 蝶

消息園林春徧玉腰粉翅三徑尋芳栩栩翩翩消受幾
許風光漾輕烟飛隨柳絮避細雨宿向花房漫悠颺三
三兩兩滾過東墻情長錦雲深處困酣還戀欸舞傍
惶縹緲芳魂知他夢裏也迷香問何似嬌娃嫵媚料未
輸蕩子輕狂暗形相被誰偷得繡上羅裳

菩薩蠻

迴文

月斜穿牖疎簾隔隔簾疎牖穿斜月長夜怯空床床空
怯夜長影孤嫌被冷冷被嫌孤影清漏滴聲聲聲聲
滴聲滴